

पिलेमोनिहक कुिर्स्तुना बळयि पोलु लोहतद सीटि

इद सीटटुन रासवाल येसुना बळयि पोलु आंदोग. पोलु कुलुसि सहरतोर विस्वसिरिहक सीटि लोहतस्के, इद सीटटुन वने रासतोग. इद सीटटुन पोलु पिलेमोनिहक रासतोग. पिलेमोन कुलुसि सहरते मतोग. पोलु ओन कलियिसि, बेसता कबुर वेहतस्के, ओग विस्वसि आतोग.

पोलु इद सीटटुन बाराहक रासतोग इतेके, पिलेमोन उनेसिमुस इनवान ओर्युल तासिस मतोग, मति उनेसिमुस तना माल्कानगडाहि रोम सहरते विततोग. विततस्के, अगा ओग पोलुन कलियिसि विस्वस कीतोग, कीसि पोलु जेलते मनदहपा, ओना सेवा कीसीतोग. पया ओसोवने नीवा माल्कानगा मल्स अन इनजोर, पोलु वेहच ऊळतोग, मति उनेसिमुस रेयतहक कुंजोग. रोम सर्करताड अडोना इसबते, विततोर ओर्युलतोरिन, तमाड माल्कालोर हक्किंदुर. अदिनेनाहक पोलु पिलेमोनिहक सीटि लोहचि, उनेसिमुसिन ऐंगेतोग विस्वसि इनजोर ओसो तासा, ओन्क सिक्सा एमा इनजोर, इद सीटटे वेहतलाह आतोग.

मुनेताड पोल्लोड

1-2 नना पोलुनन, किर्स्तु येसुना सेवा कीयनाहक जेलते महनन, ✨ मावा तोळतोग तिमोति बार, ✨ इद सीटटुन पिलेमोनिहक रासलाह आतोग: पिलेमोन, मावा गोतयानिन ओसो ऐंगेतोग सेवकनिन, (नीक जय येसु)! ओसो मियगडद विस्वसि अपियाहक, मावा सगे बेसता कबुरतासाटि लळेम आयवाल अरकिपुसिहक, ✨ अहे नीवा लोतगा जमा आयवालोर विस्वसिरा मुडुहक, ✨ (मयेनाह जय येसु)!

3 मावा देवुळबाबानाहि ओसो किर्स्तु येसुसामिनाहि, मीक सुकमि, देख्वा दोर्कि. ✨

पिलेमोन बह जीवा कीतोग, बह विस्वस कीतोग

✨ **1:1-2 1:1-2** इपिसुसतोर 3:1 ✨ **1:1-2 1:1-2** 2 कुरिततोर 1:1; कुलुसितोर 1:1-2
 ✨ **1:1-2 1:1-2** कुलुसितोर 4:17 ✨ **1:1-2 1:1-2** रोम सहरतोर 16:5 ✨ **1:3 1:3**
 रोम सहरतोर 1:6-7

4-5 पिलेमोन तमो! निमा येसु किर्स्तुन विस्वस कीतदिन, सबेटोर देवुळता मन्कलोरिन जीवा कीयनदिन केंजतन.✱ अदिनेनाहक बेस्के नियेनाहक पार्तना कीयहनन, अस्के नीक सीता कीस, नियेनाहक देवुळतुन जोहर कीयहनन.✱

6 नीवा विस्वसतेनाहक, बेद्रम निमा दुसोर विस्वसिरिन सायता कीयहनन इनजोर केंजतन. अह कीताहक, किर्स्तुनेनाहक माक दोर्कनव सबे बेसताड देय्वान, निमा पुनजोरैन दाकिन इन्जि,✱ नना पार्तना कीयहनन.

7 तमो! देवुळता मन्कलोरिन जीवा कीसि, ओरा जीवातुन पकाय दळदळ आनाह कीतिन.✱ अद्रम कीसि, निमा नाक बेस-नेहना गिर्दा आनाह कीतिन, नावा जीवातुहक सुकम आनाह कीतिन.

पिलेमोनिहक पोलुना अर्जि

8-9 अदिनेनाहक बेद ओपिहता, तान कीकिन इन्जि, नीक जीवा कीसि, नना पोलुनन अर्जि कीयलाह आतन.✱ नना किर्स्तुना (बळयिनन इनजोरे, अदिकरते) नीक उकुम ईया पगयहनन. मति नना मुय्तोनन आतन, किर्स्तु येसुना सेवा कीयनाहक, जेलते महनन इन्जि,✱ नावा अर्जतुन केंजा.

10 (नीवा वित वातोग ओर्युलतोग) उनेसिमुसना लोप्पा,✱ नीक अर्जि कीयलाह आतन;* ओग नावा मगना लेहका आतोग.✱ नना इगा जेलते मनदहपा, ओग विस्वस कीताहक, नना ओना तपेना लेहका आतन.✱

11 मुने ओग नीक बेदे कबळतुहक ओजोग, मति इंजेके ओग माक इर्वुरिहक आसि, पका कबळतुहक ओजवाल आतोग.†

12 उनेसिमुसिन नना पका जीवा वाटिहनन, ओन मुर्तिय विळस वसो. तेला मति इंजेके मल्हच नियगा लोहतलाह आतन.

✱ **1:4-5 1:4-5** इपिसुसतोर 1:15; कुलुसितोर 1:3-5; 1 तिसलुनितोर 3:6 ✱ **1:4-5 1:4-5** रोम सहरतोर 1:8-10 ✱ **1:6 1:6** पिलिपितोर 1:9; कुलुसितोर 1:9-10 ✱ **1:7 1:7** रोम सहरतोर 12:13; 1 कुरिततोर 16:18; पिलेमोन 20 ✱ **1:8-9 1:8-9** रोम सहरतोर 12:1 ✱ **1:8-9 1:8-9** इपिसुसतोर 3:1 ✱ **1:10 1:10** कुलुसितोर 4:9 * **1:10 1:10** पोलुना कालमते बोर ओर्युलतोर मंदुर, ओरिहक बूति दोर्को आंदु. ओर पूरा माल्कालोराय मालसोमलेहका मंदुर. माल्कालोर ओरिन बेचानाह विळसोर आंदुर, अचानाह ओर पूरा माल्कालोराय कय इळन मंदुर. ✱ **1:10 1:10** 1 कुरिततोर 4:14 ✱ **1:10 1:10** 1 कुरिततोर 4:15 † **1:11 1:11** उनेसिमुस इद पेदिरता अर्तमि “कबळतुहक ओजवाल” इद्रम आस्ता.

13 नना बेसता कबुरतुन पोकुर कीयनाहक, जेलते महनन.✧(इगा नावा संगे निमा मतेके, नाक सेवा-साकुर कीसेवेनिन.) नीवा जागाते ओग नाक सेवा-साकुर कीस इयेग इनजोर, ओन इगा नावा संगे तासलाह ऊळतन.

14 मति नीवा पोल्लोलेवा, नना बाताले कीयलाह विचर केवोन. बाराहक इतेके निमा कीयनद बेसतल कबळि जबरदस्तिते केवा, नीवा कुसिते कीयना इनजोर, नना ऊळिहनन.✧

15 उनेसिमुस अमेसा-अमेसातुहक नियगा मनदलाहि, ओग गळिकहक नियगडाहि एगतोग बहे!✧

16 इंजेके निमा ओन ओर्युलतोग इनजोर तासमा, मति ओग किर्स्तुन विस्वस कीताहकु, मावा तमोनलेहका आतोग.✧ नना ओन जीवा कीतन, इंजेके निमा ओन ओर्युलतोग इनजोर वने, सामिन विस्वस कीताहकु तमोग इनजोर वने, पका जीवा कीमु.✧

17 सामिना कबळते निमा नाक नीवा ऐंगेटोग इनजोर इतेक अचोन,✧ नीवा लोतगा नाक बेस-नेहना केयिस उदिह कीयना लेहकान, ओन वने केया.

18 मति ओग नीवा बेदाय नुस्कन कीतोग इतेके, नियगडाहि बातालाय तेंडतोग इतेके, अद नावा करा आयि.

19 नना नीक निहच ईयहनन इनजोर, नना पोलुनन नावाय कयदे रासिसि करल कीयहनन.✧ मति उंद पोल्लो मागडमा, (नना पोकुर कीताहकु, निमा किर्स्तुन विस्वस कीसि, पूना पिसमुळतुन दोर्किह कीतिन. अदिनेनाहक) निमाने नाक करा महनिन.

20 इंगो रा तमो! सामिनेनाहकु, उनेसिमुसना पोल्लोते नाक गिर्दा ईम! किर्स्तुनगा निमा नावा ऐंगेटोग विस्वसिनिन इनजोर, नावा जीवातुन दळदळ आनाह कीम.✧

21 नावा पोल्लोतुन केंजिहनिन इनजोर, बर्वस कीस रासलाह आतन. नना वेहता पोल्लोतुहकाय, एक्वा वने कीकिन इनजोर पुतन.

22 मीट नयेनाहक पार्तना कीयलाह आतिर. अदिहक देवुळि मीवा पार्तनातुन केंजिसि, नाक जेलतगडाह विळिसह कीयगा इनजोर, नावा आसा मन्हता.✧ नाक विळिसतस्के मियगा वायकन, नयेनाहक रोमलाह उंद अरा तयर कीस तासा.

✧ **1:13 1:13** पिलिपितोर 1:7 ✧ **1:14 1:14** 2 कुरिततोर 9:7; 1 पत्रु 5:2 ✧ **1:15 1:15** पुटमुळि 45:5,8 ✧ **1:16 1:16** मत्याल 23:8; गलातितोर 3:28 ✧ **1:16 1:16** 1 कुरिततोर 7:22 ✧ **1:17 1:17** 2 कुरिततोर 8:23 ✧ **1:19 1:19** 1 कुरिततोर 16:21; गलातितोर 6:11; कुलुसितोर 4:18; 2 तिसलुनितोर 3:17 ✧ **1:20 1:20** 1:7 ✧ **1:22 1:22** 2 कुरिततोर 1:11; पिलिपितोर 1:25; 2:24; इब्रितोर 13:19

आक्रिता पोल्लो

23 किर्स्तु येसुना सेवा कीयनाहक, इपपरास☆ नावा संगे जेलते मन्हतोग,☆ ओग नीक जय येसु वेहतोग.

24 अद्रमलेहकाने नावा संगे कबळ केवालोर मार्कल,☆ अरिस्तरकुस,☆ देमस, लूकाल,☆ वेर वने नीक जय येसु वेहतलाह आतोर.

25 येसुसामि किर्स्तुना देव्वा मियगा मनि. आमेन.☆

☆ **1:23 1:23** कुलुसितोर 1:6-8; 4:12 ☆ **1:23 1:23** रोम सहरतोर 16:7; इपिसुसतोर 3:1 ☆ **1:24 1:24** बळयिर 12:12; 2 तिमोति 4:9-11 ☆ **1:24 1:24** बळयिर 19:29 ☆ **1:24 1:24** कुलुसितोर 4:14 ☆ **1:25 1:25** गलातितोर 6:18

Hill Madia
Hill Madia standard translation

copyright © 2021 Wycliffe Bible Translators, Inc.

Language: (Maria)

Contributor: The Seed Company

All rights reserved.

2025-05-15

PDF generated using Haiola and XeLaTeX on 14 May 2025 from source files
dated 15 May 2025

9f0bdb58-21f8-514e-8286-5b2942b7d458